

## Bunkes

Zônder det ik 't aanvankelik in de smiëze had, had ôzzen Harie van 8 jaor iets gans niejs ôntdek. Van die bônne invölle die in de tillevisiegids staon en insteure.

Ik kwaam dao achter door ein tillefoontje van eine vertaegewaordiger, of miene naam Hermans waas oét de huppedepupstraot. Ik zek det klok vuul moeis is 't neet maar ik doon 't d'r mei. Dao begôs dae vertaegewaordiger zôn bietje smaerkeeziger te praote: "Ik bin dealer van Mercedes, kump 't ôg oét as ik efkes aan kom met 't nieje medel, dan kint ge d'r ouk geliék ein proofritje mei make". Ik zek "eine nieje Mercedes, ik heb nog gen geld veur eine nieje fiets". "Jaomaar" begôs dae al ein stök minder vrintelik, "waorum heb ge dan die bôn ingevöld, det geej interesse heb, ik heb ze heej veur mich ligge, aafzender d'n hiër H.Hermans oét de huppedepupstraot". Aoh ik zek det is ôzzen Harie, offe dae dan maar kôs spraeke,.

Ik zek det kan, maar dae is pas 8 jaor en haet waal ein diek spaarverke, maar of dao genôg in zit veur einen Mercedes betwiéfel ik. Dao woort d'n haoren d'r op gegoeid.

Ôzzen Harie greinsde met 't gezich van eine ziërauver zônder auglepke.

Jao 't is ein klevver kaerelke met ein moeie hand van schriëve, en hae haet noow einmaal zien lol aan 't invölle van die bunkes. Maar letsaan leep 't oét de hand, hae had op de taofel ein ganse doës Libelles en Margriete umgekiep, en dao zitte dich ein bende bônne in, hae knipde en vödde in det 't ein lös veur 't aug waas.

Hae kreeg stapels folders thoés gesteurd, van parketvloëre wies waterbedde, van w.c. deksels wies tuinplante, allemaal aan d'n hiër H.Hermans. Harie kreeg miër pos as ik, maar ja as zôn jungske dao noow lol aan haet. Maar vurrige waek wie hae nao schoël waas zoog ik op zien kamer ein bukske ligge met niks as bloët en smaerige taal. Ik heb die ens opgebeld en flink de oëre gewasse, wie ze 't waoge um aan miene zoon van 8 jaor zôn smaertlapperie te steure. Nauw ja, dae man waas blie det ik belde hae kôs toch ouk neet aan 't handschrif zeen wie ald emus is.

Maar waat ech vervaelend waas, wie d'r sáoves eine vertaegewaordiger aan de deur stônd hielemaal oét Rotterdam um eine stôfzuuger te demonstrere. Wie dae dao zoë zielig aan de deur stônd, had hae iets weg van eine pas aafgesmienkde circusakrobaat. Ik heb um maar ein lekker tas kôffie gegaeve met ein cigaerke.

Gelökkig had hae zelf ouk kinder

Maar ik gluif det ik Harie noow te graze heb. Wie d'r vurrige waek zônnen dieke envelop van de Marine veur meneer H. bezörg woort, heb ik um aangespaord allemaal die aanmeldingsbônne in te steure. Ik zei "zorg dat je er bij komt bij de Marine, dan meugse iërs fein in zôn kezerne tösse de zweitzök gaon woëne en daonao dauwe ze dich lekker wie einen hiëring in ein tunke in zônnen inge duikboët is det neet leuk. Hae schuuverde zich allein maar.

Hae haet al ein paar waeke genne pos miër gehad, de Marine deej de deur dich.

Stôm hé

Wiel Hermans Venlo